



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

**Ukraine-i Russia atema rara
aliba China nunger ana apu**

**Rudi Voller-i Germany team
den tenangzüktepba yanglushi**

VOL. XXII ISSUE NO. 176 (ADOK 176)

DIMAPUR

YANGTEPNÜ THURSDAY

RONGCHII (APRIL) 10, 2025

₹ 5.00

Kohima nung Naga kin 19-i lungkak aitba sülen Amit Shah dangi shidi zülu

Kohima, April 9, 2025 (TYO): Nagaland aser Manipur nungi Naga kin 19 longjemer Kohima nung lungkak aitba sentong tulu ka agiogo.

Centre sorkari Indo-Myanmar arrtsü atsü dangtsü lemtetba anema parnoki iba sentong ayongzüka agi.

Kohima tiyongtsü Old MLA Junction nung Angami Public Organisation (APO)-i sentong ayongzüker aser state anaprong nungi Naga kin 18-i shilem agia liasü.

Parnoki Nagaland Governor ajanga Union Home Minister dangi memorandum ka yokogo aser iba nung arrtsü tebilemtsütem aser lisopur Naga nunger dak kongshiba onüktem zülua lir.

Iba memorandum nung Angami aser Nagaland nungi kin 14 den Manipur Naga kin 4-i sign asü.

Nagaland nungi Konyak, Chakhesang, Lotha, Sangtam, Rengma, Tikhir, Chang, Khiamniungam, Yimkhiung, Pochury, Zeliang, Ao, Phom aser Sumi nunger aser Manipur nungi Maram, Poumai, Tangkhul o Mao nungeri sign asü.

February 6, 2024 nü Free Movement Regime (FMR) agentsü aser India-Myanmar international border atsü dangtsü lemtetba osang sangoktsü dang onok kanga aoksa. Iba tebilemtsü angateta onoki FMR agienba lemtet magizükba metetdaksü ta memorandum nung shia lir.

"Onoki temepishiba balala agütsüogo aser Naga state



Old MLA Junction, Kohima nung Angami Public Organisation (APO)-i April 9, 2025 nü Indo-Myanmar arrtsü atsü dangba anema ayongzüker sentong nung adenertem kar angur.

sorkaria FMR agienba anema bangzüng ka renem aser Centre sorkari tangatetba ka arutsü ta imlaa liasü. Ajisüaka, Centre-i Naga nunger ola mangashii FMR ajunga magiener ta shia inyakyim talila akangshiogo" ta parnokisa Home Minister Amit Shah dang ashi.

"December 24, 2024 nü Ministry of Home Affairs-i India-Myanmar nung nisung senzüsensongba inyakyim meyipa repringshi aser 'border pass' system tenzük. Iba ya arrtsülen kilometre 10 telongtet nung alirtem asoshi lir aser tetuyuba tasenba nung entry/exit points 9 dang lemtzüksü, ajisüaka Nagaland-i Myanmar den kilometre 215 agi arrtsütepa lir" ta memorandum nung shia lir.

December 17, 2024 nü Ministry of Home Affairs-isa Foreigners (Protected Areas) Order, 1958 kübok Protected Area regime nung Nagaland alenbangba metetdaksü. December 17 tetuyuba aser December 24 inyakyim ya

atongtepa dang agütsü ta parnokisa ashi.

"India-Myanmar arrtsülen telongtet ajema akümba ajanga kilometre 10 adena orr aliba lisopur Naga nunger ka India-i arura Foreigners Act kübok pur tai tongloksütsü akok. Ano arrtsü adena senzüsensongba atema system tasen ka tenzük ta shia Centre-i ano Naga nunger putiotsü aser sobaliba temetentem alema inyakogo" ta memorandum nung shia lir.

India nüjiso mangudang nungi Naga Hills (India-Myanmar borderlands) nung Naga nunger linük kümteta liasü. Iba nungi Naga nunger putiotsü temetentem angur aser tanü India linük ya British nunger yimsüsüba nungi anguba senmang ka dang lir. Lisopurtem dang nungi temelaba magi India linük arrtsü ladang saka Naga nungeri kodanga 'colonial borders' magizük ta Naga kin 19-isa Amit Shah dang shiogo.

India nüjiso anguba sülen Free Movement Regime (FMR) ya India aser Myanmar lennirtemi shisateta tenzükba lir aser iba ajanga Naga nunger libaliro akhümtsüsubüta ta kuli agütsür. Mezüngbo FMR ajanga arrtsülen kilometre 40 telongtet nung aliba Naga nunger talenba kecha melii senzüsensongba temelaba agütsü. Ajisüaka 2018 nung iba

ya kilometre 16 dang aküm aser tangbo kilometre 10 dang kümogo. Anungji tanü Centre sorkari arrtsü dak sendakba maparen inyakba ajanga parnoki British nunger yimsüsüba ama lisopurtem hao ta maliba aser tashi den litsü amokbanga yunüba tangatetba ang tali jangjatsür ta parnokisa ashi.

India-Myanmar arrtsülen aliba Naga nunger atema international border ya "imaginary line" ka dang lir. Akhidang nungi Naga nunger India-Myanmar arrtsülen ka ama dang lia aru. Ajisüaka tanü Naga nunger dang tashiyim agi pei lima nung senzüsü atema 'border pass' meshidaksüba ya magizük aser iba ya pei kidang senzüsensongba atema temelaba meshiba den kasa lir ta Home Minister Amit Shah dangi züluba memorandum nung shia lir.

Külen, India-Myanmar arrtsü atsü dangba ya magizük kechiyong arrtsü atsü dangba aser ozü nübortem o ali lemdangba ya ozü lisopur temetentem alema lir, ta parnokisa ashi.

Anungji FMR ya mezüng tenzükba ama tanaben bener arua inyaksüba aser iba ya Naga nunger putiotsü o sobaliba temetentem akhümtsüsuba dang masü saka India-Myanmar arrtsülen tensa tiptema ayutsü atema lir ta parnoki Amit Shah

dang shiogo.

Nagaland nung PAP/RAP benokba ya Naga nunger lisopur temetentem anema inyakba lir aser iba ajanga onok asoshi lendong bentsür arutsü. Protected Area Permit (PAP) benokba ajanga Nagaland aser North Eastern state temi foreign tourists aruba noktangtsü aser Nagaland nung tourism industry nung takoksa bentsür arutsü ta memorandum nung shia lir.

United Nations Declaration on the Rights of Indigenous Peoples (2007) nung sign asür ka ama India-i Indo-Myanmar arrtsülen alirtem ya Article 36 tangatetba nung benshitsüla ta parnokisa ashi.

Article 36 nung "international borders agi lemdanga aliba lisopurtemi tongteprateptsü, tesentaktep ayutsü aser amaliteptsü temeten lir, iba nung tamangba, sobaliba, yimtenren, rongsenketsüng aser lokti nüngdaktem dena lir aser iba ya parnok sasep mesüra arrtsü adener tangartem den asoshi lir" ta lateta aliba memorandum nung nenshiogo.

Amit Shah-i item onüktem angatetsü aser akhangba ama mapa inyaksü ta Kohima nung aliba Naga kin teloktemi amanger ta memorandum nungsa metetdaksüogo.

Tanü KABA nung Senior Pastor Rev Sentisashi Aier-i temoatsü meshia sarasadem rally tenzük aser APO president Thejao Vihienuo-i okilajembi.

Sentong nung Longwa Village, Mon nungi Khampei Konyak aser Dan Village, Noklak nungi P. Shingnya nati arrtsülen timtem ajuruba osang lemsatep.

Sentong nungsa senior advocate Timikha Koza-i ozüng dak sendakba lemsatep aser Naga nunger tenüng nung Kohima Sumi Hoho president K. Shiwoto Wotsa-i o jembi.

Tesayur A.Lanunüangsang alima nungi pilaogo



Prof.A.Lanunüangsang

oagi aremtsü atema apusoa bener tuogo.

Asür Prof. Lanunüangsang Imchen ya School of Agricultural Sciences and Rural Development, Medzephima nung tesayur mapa inyaka tenzükba nungi Nagaland University nung Pro Vice Chancellor tashi inyakba tesayur aser pei mapa nung meranga aser nendaka inyakba lenir ka liasü.

Pa Ao Senden Literature Board nunga mendenbuba liasü aser pai Ao nung züluba tazüngtsü kakat aika tanü school aser college nung agidagi. Pa mapangsa Ao dictionary, Arok Osep adoktsüba mapatem renema ao. Pa ya kakat zülur aser lokti nung temelenshi tajung bener arutsür lenir tajung ka liasü.

Pa den asüpila sentep sentong ka Mokokchung town nung par kidang Rongchii (April) 10 anepdang 7:00 ako nung agir par tetsü taso yimkong Mongchen lima nung oagi pa mang aremtsü.

Dimapur, April 09 (TYO) : Pei kin meimba walunir aser tesayur tajung Prof.A.Lanunüangsang mapang talangka temang mejungi arur, tanep Rasemnü Rongchii (April) 9 anepdang züngia lia, Dimapur nung par kidang lia alima nungi pilaogo. Pa arishi küm 81 liasü.

Pa den asüpila sentep tajung ka Dimapur nung par kidang Dimapur Ao Baptist Arogoi ketdangsüa agir, pa temang Mokokchung town ajanga par tetsü taso lima Mongchen yimtak

Union MoS Suresh Gopi-i Nagaland semdang

Dimapur, April 9, 2025 (TYO): Union Minister of State for Petroleum and Natural Gas & Tourism, Suresh Gopi-i April 9, 2025 nü Nagaland semdangi arua lir.

Pa den PS, Narain aser Bhopinder Singh nati State Guest ama arua lir.

Tanü MoS Suresh Gopi-i Niuland district semdang aser department balala den senden amenba den külemi civil societies lennirtem den ajurutepa sensaksem.

Gopi-i ketdangsürtem den centrally sponsored schemes inyakba osang metetpela aser tang teinyakdak schemes mapang

shitak nung tembangtsü ashi.

"Nagaland ya tanü dang nungi jenjang tajungba ka nung alitsüla. Nagaland nung tourism atema teinyaktsü aika lir aser ali rongsen peria dang lir saka inyakyim aser revenue tebilemtsütem repringshitsü nüngdaker" ta MoS Gopi-isa ashi.

"Niuland ya tasen aser underdeveloped district ka lir. Union MoS-i district semdangba ajanga pai metongi aliba nübortem tonga aotsü aser terenlok bentsür arutsü nangzüka ama inyakba kuli agütsür" ta Niuland Deputy Commissioner Sara S Jamir-i ashi.

Iba senden nung PHED,

DRDA, Agriculture, Mission Vatsalya, Industries & Commerce aser School Education ajanga PowerPoint nung centrally sponsored schemes inyakba osang lemsatep.

Niuland District Gaonburas Association aser Niuland Area Citizens Forum also nungia teshimtet nübotemi o jembi aser parnoki MoS Gopi nem memorandum balala agütsü.

Senden amenba sülen MoS Gopi-i Nikhekhu village nung Government High School Nito semdang aser idakji school ketdangsürtem aser kakatshirtem den ajurutepa sensaksema liasü.

Mkg Press Club aser Dept of Sociology, FAC na külem sür shisatokden ka ayongzük



Shisatokden sentong temer külen shisalen sayur den Mokokchung Press Club züngsem, tesayurtem aser shilem agirtem külemi tangokba noksa nung angur. Mokokchung, 9th April, 2025.

Mokokchung, 09 April (TYO): Mokokchung Press Club aser Department of Sociology, Fazl Ali College, Mokokchung na külem sür “media aser loktiliba” onük nung shisatokden sentong ka FAC conference hall nung kaogo. Iba sentong nung FAC nungi sociology azünger dang masü Jubilee Memorial College, Mokokchung nungia sociology azüngertema densema liasü.

Iba sentong nung shisalen sayur Mokokchung Press Club Tir & Mokokchung Times yimozülur, Limalenden Longkumer-i jembidang, tanü bendang len, India lima mesüra asen atep nung tebilemtü balala atalokbatemji teimbaka media ajanga dang asenoki meteter, kodang asenoki media ta jembidir, asenoki ya bilemtettsüla: “media ajanga loktiliba melenshidaktsür”, ta metetdaktsü.

Kaket riju nung azüngba textbook nung manguba ojang aika tanü alima media balala ajanga angazüker, media balala ajanga oshi, yimyatsüya aser libaliru jenjang dena atsünga arur. “Ne tebilemba, nai alima reprangba, ne shisatsü – nai yimdangi arur asü masüar, item ajakji media ajanga lir aser iba ajanga media ji tashi tulu lir, ta pai ashi.

Tanü asen state nung media nung adokba osangtemji

reprangdangra teimbaka – mapa manguba tebilemtü indang, ochimashi mapa, o satema jembiba sotba, sobaliba temzüngozüng tim mesü amshiba, taitok meshia züluba shiti balala, itemji lir, ta pai kuli kar bener arua lemsatep.

Media ajanga alima tesem balala nung atalokba dang sayur masü, saka iba ajanga alima yanglutsü/arakzüdaktsüsü tashi dena agütsür aser ibaji kanga tongtibang lir, ta pai ashi. Nagaland nunga local media ajanga arogo nung dena temelenshi adokdaktsüba ajangshiogo, iba den business tsütsü mapa tasen purateta inyaksü maongka sayuba, sarkar mapa alibasa mera taketba ta asüba akhi mulungsentsü melenshidaktsüba, tanü lanurtemi rongsenketzüng ajungkettsü asoshi mapa tasen apiteta inyaksü nungdakba meteta kümдар, private sector nung ya mapa inyaksü maongka aliba meteta akümba, item shisatsüji nisung kari media tim lenmang nung kanga junga amshiba tamaitü lir, ta ashi. Local media ya asen loktiliba tanüdagtsü mesüka lir, ta paisa shisem.

Nai media tim lenmang nung amshira, alima melenshiba nung na shilem agir ka asütsü, saka nai tim lenmang nung mamshira loktiji tejakleni anir aotsü mesüra

sotsü ne shisatsü dak keta lir, ta paisa kaketshirtemi bilemdangtsü onük ka ashi.

Paisa tatem nung kaketshirtem dang tasüngdangba kar agütsü - mezüngbuba nung, kechiba asen lokti nung tanü tashi ashibangba (superstitious) dak amanger? Tanabuba nung, kechiba asen lokti nung ochimashi mapa memerenshir aser ochishir mesenpettsür? Tasembuba nung, kechi inyakba agi kin aser yim atema dang bilemba (tribalism & village-ism) ya koktetsü? Pezübuba nung, tamang yimsü (religion) nung ya loktiliba jenjang (value) kecha lir mali? Lira, kechiba iba yimsü indang tesayuba nung manitakteter? Pungububa nung, kechiba scientific tasüngdangba (inquiry), aroka bilemdangba (critical thinking), aser Naga lokti teimbaka nung kechiba tongtibang lokti tebilemtü metetyim indang tezülen yutsür? ta asüngdanga liasü.

Iba sentong nung FAC principal, Dr. I Wati Imchen, Dept. of Sociology HoD, Dr. Adangla Changkija, Asst. Prof. Dr. Limasenla Jamir parnokia shilem balala agi aser BA 6th Semester azünger, Humsen menden liasü. Iba sentong nung asüngdangba aser langzüba senden balaka lia kaketshir aikadi shilem agia liasü.

Pimla nung tai maket tanur tetsü tepsetba aitsür

Dimapur, Rongchii/April 09 (TYO): Pimla nung April 7, 2025 nü tai maket tanur tetsü dak tashiyim amshia raksatsür tepseta yutsüba khukhua aitsür, ta Chakhesang Mothers' Association sangdong ajanga ashi.

Iba mapa tamajung ya tai maket nisung dak inyakba kisüng masü saka asen loktiliba nung tetsürtem anema inyakba lir. Iba ama mapa tamajung yagi tetsübo adokdaktsür, samadaktsüsüla azüdokshi yimya asendenshir. Iba ama tensa nung onok ajem-ajema meliteter, ta sangdong ajanga ashi.

Iba mapa inyaker nem ozüng agi melaba temerenshi ajunga agütsüsüla aser ketdangsür dang menua melie ochi obendang agütsüsü asoshi tasü ita mera agitsü ajungshir.

Asür-i yutsür aoba kinunger den onoki asükhu lemsateper

aser tetsürtem tetsübo nung malitsüsa ochi, temeden asoshi maneni nokdaktsü, ta Chakhensang Mothers' Association sangdong ajanga ashi.

Western Sumi Hoho-ia sangdong ka nung, Mahakam village nungi arishi küm 35 tain tanur tetsü ka April 7, 2025 nü tepsetba osang angashia kanga jashir aser süngmanger, ta ashi.

La tasümgang lenmang tezülen yuja aliba ajanga nübur ajunga mulungjang anokshitsür aser aoksatsür.

Iba ama mapa tamajung yagi nisung ajak taoksa tia nung yutsür aser tetsübo aitaaktsür. Iba ama mapa tamajung inyaker ya tangatet lokti den külemi alitsü metemsü. Onoki iba ama tazü mapa tematiba jenjang nung aitsür aser nübur ajunga dang iba ama temenen mapa

aitsüsü ayongzüker, ta WSH sangdong ajanga ashi.

Mapa meranga inyakba tetsü ka tapi agi tepsetba yagi asen lokti nung tetsür anema azüdokshiba tali akumba sayur, anungji ozüng amshirtem dang mera tejangja agia asen lokti nung tetsürtem kumzüka ayutsü ayongzüker.

Onoki ano ozüng amshirtem dang tekeratiba nung ochishia bushisüngdang aibelener pua tapet temerenshi agütsüsü ayongzüker.


Tarutsü nung iba ama mapa meinyaktsüsa tatishitsü sayua ozüng tesashitiba agi merenshitsüla.

Asür-i yutsür aoba kinunger den onok dena lir aser mangyimer den asükhu lemsateper aser asür tanüla tesunep nung anisüngzükgang ta sarasademtsür, ta WSH sangdong ajanga ashi.

OFFICE OF THE YAONGYIMTI (OLD) VILLAGE COUNCIL

B.P.O. Phangsang P.O. Chuchuyimlang
Mokokchung, Nagaland - 798614

TENÜNGSANG OLA



Yaongyimti senso nungi lanur tajung Mr. W. NAMANG YIMJONG, s/o. N. Wongto Chingmak, pai tang tembangba Nagaland Super League (NSL) nung Longterok FC meyonga asaya liasü. Pa sempet tajungtiba agi kanga meranga bendanga agüja asayaba ajanga iba NSL nung U-20 asayar rogo nungi tajungtiba ta shimteta “GOLDEN STAR” award ajangzükteta Toyota Glanza, 2-lakh Cheque, Trophy aser Meritorious citation tem ngutetba asoshi Yaongyimti Village Council-i anir senso ajaki pa nem khonang tetushi agütsüba iba zülü ajanga tepela lemsateper.

Tarutsü anogotem nung pei wadang nung tali ajemalushir jenjang temaba nung takok ngua asaya aotsü moaja sarasademja atar.

(M. Yangei)
Chairman

(M. Songli)
Secretary

Kohima nung kaketshir dak teka sangshiba aitsür: RSZ

Dimapur, Rongchii/April 09 (TYO): Kohima nung February 20, 2025 nü Gwathonlo Magh züka merenshiba asoshi khukhua aitsür, ta Rengma Selo Zi sangdong ka ajanga ashi.

Iba timtem ajurur alisang ya Don Bosco Higher Secondary School, Kohima nung Class 10 section-A nung azünger lir.

Kaketshir Gwathonlo Magh ya külem class nung azünger anati uniform nung arua o tamajung shia merenshiba sülen teka sangshi aser tang Guwahati nung mozü kidang takum kumzüksü mechi intensive care unit (ICU) nung lir, ta Rengma Selo Zi sangdong ajanga ashi.

Tanü tangatetba aliba lima ka nung iba ama mapa tamajung

inyakba ya tematiba jenjang nung aitsür, koba khenyongi tatok magütsütetla mapa lir.

Iba ama tazü mapa inyaker nem tapet temerenshi agütsüsü langa lir.

Timtem ajurur alisang aser par kinunger den onoka dena lir, aser ozüng amshirtem dang nungdakba mera agia ochi obendang agütsüsü akhanger, ta RSZ sangdong ajanga ashi.

Iba tatalokba tekeraba nung bushisüngdangtsü atema pa azüngba kakets reju-ia amalitep akatsü aser temulung agütsüsü ayongzüker.

Ozüng agi melaba ama ochi obendang magütsüra onoki ajem-ajema melie nokdaktsü, ta RSZ sangdong ajangasa ashi.

Kohima DPDB senden April 15 nü amentsü

Dimapur, Rongchii/April 09 (TYO): MLA aser Chairman, District Planning & Development Board, Kohima, Dr. Tseilhoutuo Rhütso-i sangdong ka nung ita shia amenba Kohima District Planning & Development Board

senden April 2025 atema DPDB Conference Hall, Kohima nung April 15, 2025 anüngdang 11:00 ako nungi amentsü, ta metetdaktsüogo.

Iba senden nung züngsem ajak arua adentsü ayongzüker, ta sangdong ajangasa ashi.

Dimapur Excise ajanga heroin gram 800 apu

Dimapur, Rongchii/April 09 (TYO): Dimapur Excise ajanga anogo ana tsüngsü pua jajar April 8, 2025 nü Lamminlen Kipgen (Age-31), S/o Letkhohao Kipgen, R/o Pangjang Vill. Saikul, Senapati, Manipur ket nungi brown sugar (Heroin) grams 800 apu, ta sangdong ka ajanga ashi.

Iba temesepba mozü ya Manipur nungi Dimapur nung ayoktsü bener adokba liasü. Ajisüaka kanga junga meita oa itdangiter osang bendener duty party temi mozü bena alisang ya Eros Lane area, Dimapur nungi apu.

Nisungba anema NDPS Act 1985 kübok ken o benoka bushisüngdangba mapang lir, ta sangdong ajangasa ashi.



Fourth Nagaland State Finance Commission indang Chairperson, Sarah Ritse-i anir Commission ketdangsür temi April 9, 2025 nü Deputy Commissioner, Peren indang Conference Hall nung Peren, Tening aser Jalukie Town Council nungi Executive Officers, Councillors aser stakeholders tem den sensaksemba sentong ka agidang tangokba noksa nung angur.



April 09, 2025 nū Sabarmati Riverfront Event Centre, Ahmedabad nung All India Congress Committee (AICC) senden nung Congress Parliamentary Party Chairperson Sonia Gandhi, Lok Sabha nung Opposition lenir Rahul Gandhi aser party nung lenirtem tangokba noksa nung angur.

Tanem-tanemi democracy jenjang raksatsüdar: Kharage

Ahmedabad, Rongchii/April 09 (Agencies): BJP-i ashikülak ajanga Maharashtra assembly election nung takok angu, ta shia Bodhbarnü Congress Party Tir, Mallikarjun Kharage-i elections nung ballot papers amshitsü tayongzükbaga agütsü.

Ahmedabad nung aliba Sabarmati Riverfront Event Centre nung ayongzükbaga All India Congress Committee (AICC) senden nung jembidang Kharage-i, capitalist tem tajangzükbaga ngudaktsüsa atema Modi sorkari sorkar kiojentem ayoker aser tanem-tanemi democracy jenjang raksatsür, ta tai tongloktü.

"Alima ajaki EVMs amshia aliba nungi ballot paper dangi meyiper, ajisüakaga asenokbo EVMs amshir. Iba ya tashioktsüba lir. Parnoki onok dang kuli sayuang ta ashir.

Ruling party tajangzükbaga ngudaktsüsa aser opposition takoksa ngudaktsüsa nenoki item ama techniques yanglur," ta Kharage-isa metetdaktüsü.

Ajisüakaga iba linük nung lanurtemi 'onoki ballot paper aginer' ta ashitsü, ta pai ashi.

"Maharashtra nung kechi atalok. Onoki iba tebilemstü onük ya ajaklen benokogo aser Rahul Gandhi-ia iba atema jembio. Parnoki koba ama voter list yanglu. Maharashtra election ya tashioktsüba liasü. Haryana nunga kasaji atalokogo," ta Congress Tiri ashi.

Kharage-i, "BJP-i menden shilem 90 nung takok angu; iba ama ya kodanga matalokdang. Maharashtra election nung atalokba ama kodanga matalokdang; iba ya democracy raksatsüsa atema liasü," ta metetdaktüsü.

"Onoki ibaji bushitetsü. Auertemji teti agia apur. Onok lawyers aser lenirtemi iba atemaji inyakdar. Onoki ibaji merangdar," ta pai ashi.

Kharage-i, "Tesüiba küm 11 tsüngda ruling party-i linük temzüng anema inyakdar. Rejutem aser tangatetbatem anema inyaker. Asenoki itemji kümzüksü atema raratsüla," ta ashi.

"Sorkari Parliament Budget senden nung parnok sünütsü asür. Speaker-i Opposition lenir tenüng tetshir saka o jembitsü temelaba magütsür. Iba ya democracy nung taaktsüka lir. O jembitsü atema Opposition lenir nem temelaba magütsü nungbo koma ser nüburttem atema ola adoktsü?" ta pai asüngdang.

Ahmedabad nung ayongzükbaga AICC senden nung 1,700 dak tali dendar.

Waqf Act anema SP-i Supreme Court nung ken o ka benokogo

New Delhi, April 09 (Agencies): Bodhbarnü Samajwadi Party (SP)-i Supreme Court nung Waqf Amendment Bill, 2025 anema ken o ka benokogo.

Linük Tir, Draupadi Murmu-i Waqf Amendment Bill agizükba sülen Congress, DMK aser AIMIM ama party aikati iba bill anema ken o benokogo.

Sambhal Lok Sabha menden nungi SP MP, Zia Ur Rehman Barq-i iba Bill anema Supreme Court nung ken o benok.

Bar and Bench-i ashiba agi temepishiba shidi nungji yamai shia lir, "Iba Act nung tenokdangbatem ajanga Muslim nungertem anema inyaker."

Ano külen Mongolbarnü Centre sorkaria-ia Supreme Court dang, Waqf (Amendment) Act, 2025 anema benokba ken otem mangadandang tamasa sorkar ken o angadandaktsüner, ta mepishio.

Parliament House anaprongla nung Waqf Bill agizükba sülen tesüsa linük Tiri sign süa iba bill ya ozüng kümogo. Iba Act anema telok

teri ken o benokogo aser ken o benokertem rongnung AIMIM tongti lenir Asaduddin Owaisi, Congress MP Mohammad Jawed, All India Muslim Personal Law Board aser Jamiat Ulama-i-Hind densema lir.

Item temepishiba ken otemji April 15 nū court bench kati angadangtsüa akok, ajisüakaga tang tashi nungbo iba osang ya Supreme Court indang official website nung metetdakja mali.

April 7 nū Chief Justice Sanjiv Khanna-i aniba bench-i Jamiat Ulama-i-Hind tenüng nung ken o jembitsür, senior counsel Kapil Sibal dang, temepishiba ken oji angadangtsü ta shiogo.

Ano külen tanga osang ka nung, Bodhbarnü West Bengal Chief Minister, Mamata Banerjee-i, West Bengal nungbo Waqf (Amendment) Act mebenoktsü, ta metetdaktüsü.

Mamata Banerjee-i Muslim nungertem dang, lai minorities nüburttem aser parnok kiojen kümzüksü, ta metetdaktüsü.

Kolkata nung Jain nungter sentong ka nung jembidang lai,

"Waqf Act agizükba ajanga nenok jashir, ta ni meteta lir. Tamang akatsüla, telemsa adokdaktüsür yimsüsütsüsa Bengal nung kecha mataloktsü," ta metetdaktüsü.

Lok Sabha nunga iba bill atema mapang talangka o entepba aruba sülen züngsem 288-i iba bill pusema vote agütsü aser iba bill anema vote agütsür 232 dang liasü.

April 4 nū Rajya Sabha nung Waqf bill pusema agütsüba vote 128 liasü aser iba bill anema agütsüba vote 95 liasü.

SÜR KÜM KA AJUNGER

"Ni rara tajungji raraogo, ni alizüng tonga asemogo, Ni tamangji yuogo." 2 Timoti 4:7



Asür M. Imkongliba, NCS (Rtd)
10.04.2024

Anogo ka süi shia asenok kotak anasatibai aoer. Anogo ka süi shia, onok nüktzü takongba akümer aser kenü anogo tatem maka tepeladak kodanga mesenshitsüsa na ajurutsüba teimla agi melentsür. Onoki na mangur saka asenok külemi aliba anogotem onoki mamar aser onok mulungjang nung item mapang tajungtemji teti bilemeter. Nü dak aketba Tsüngrem metetba yimya, nü temeim mapatem aser nai toktsüba senmang tajungtema agi maneni onok ajungshia anitsü. Iba lima nungibo na pilaogo südi saka nü taküm tanelabo onok den teti lir aser iba nung jagi onok temeim aser tashi angur aser onok taküm sangwadaktsür.

~ Temeim Kinungtsü, Chirnurtem, Anük-apang, Semchirtem aser Kinungertem.

Mangyim jashi Lemsateper

Kudi Prof. A. Lanunungsang Imchen akumli wadang temer teti tatem makadak limai ogo taa angazüka kanga jashia aser sasaseta bilemer.

Kudi Lanuba ya lenir tajung ,taremzükbaga agi sünga aliba den nükla tajung akaba lenir tajung ka liasü ta ajaki meteta lia aruogo. Onok külemi medemtepa , asen Ao kin atema tang masü, saka asen Naga nungtarutsü yimli aser sobalibaren , lokti senden longjema alitsü aser asen kintem tebilemstü, libalirulen aika atema külemi teka amteper inyaka aruogo. Talisa, 1980 nungi tenzüka onok külemi Shillong nung azüngdang (pa M.Phil, onok MA) mapa ajak nung külemi shisaliru medemtepa inyaktepa aruogo. Iba mapang nungi tenzüka lokti aser kija tebilemstütem reprangja inyakyim ajak nung onok külem ser kanga aroka inyaktepa aruogo.

Tanü asen lenir tajung asenok nungi pilaa oadokba ya asenok ajak asoshi takoksa tulu ajurur asütsü. Aji oda, lenir tajung, shisatsü temerük, kin asoshi nükla tajung agi sünga akaba Prof- Tesayur Lanunungsang ama ka asen akümlir wadang temer oadokba asoshi nübör ajaki sasaseta bilemer. Hau, pa ama lenir tajung asen kin nem Tsüngrem Tajungsangi moatsü nung asenok ajaki Pa dang pelar. Ano, maneni lenir tajung Lanunungsang ama asen kin nungi sotetsüsa asenok ajak sarasadem südi.

Ni iba otsü tatsüka ya mangyim jashi lemsatepba olen nung zülur, saka küdi Lanubai inyakba mapatem shir meshima lir, itemji anogo mapang tajung nung lemsateptsü kü tebilemba.

Tsüngremi pai toktsür aoba kinungertem aser asenok ajak nem tesünep agüjangma ta sarasadema iba mangyim jashi o lemsateper.

Kü molungjang nung nüktzü jenti lir, Adi Lanu, Salem !

~ Imkong L Imchen



New Delhi, April 09, 2025: Pakistan nung Khalsa Sajna Divas (Vaisakhi) amongtsü atema Sikh nungter telok ka New Delhi nungi apusotsü lia Delhi Sikh Gurdwara Management Committee nung züngsemtem sentong ka agiba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR THURSDAY, APRIL (RONGCHII) 10, 2025

Pei kin meimba lenir

Asenok rongnunga tangar adoksaa kaketshisatsü bushiteter aser shisaliok nung jenjang tajung ngutetba takoker aser tashitemeteterem aika lir, saka item rongnung pei kin, pei nübor aser pei oshi meimba lenir aser tashitemeteterembo ishika dang alitsüa akok. Item ishika rongnungji tang asenok nungi pilaa aosang wabong Prof. A.Lanunungsang ya ka liasü. Pa ya sensaker kibong nungi saka Tsüngrem metetba aser meranga inyakba nisung asüba agi kecha memetetba kibong nungi tashitemeteter aküm aser sensak tia nungi tulur takar kuma Tsüngremi moatsü. Pa tazüngba jenjang tulu aser Univeristy nung Pro. Vice Chancellor tashi tuaga, pai masüküm aser ajemalua pei kin, pei nübor aser pei tetsü oshi mesamadaktsüi tajungba renloka aotsü asoshi pa akaba tashitemetet, mapang, nübo aser rongsen ajak tenla agüja inyak. Aji oda, küm 20 jakdang kaketrejutem nung Ao oshi züngdaktsünüaka tazüngtsü kaket maka, kechiyong kaketreju nung züngdaktsütsüsa Aotsür Aortem rongnung kaket zülur mali temeimtsü aser tesasatsü mapang ka nung, tesayur Prof.Lanunüangsang mipang-tzüpang nung arrsangokja kaketshirtem asoshi Ao oshi nung kaketsa kaket zülü. Aji oda, külen tazüngtsü kaket maka aritepa kaket zülur aser külen Ao ocep yanglur ta koba tama aser koma tesü asütsüar meshitetba tia ka nung tebelema memetet aritepdang, belemsüker pa temang mejungi aküm aser ibaji tanaben tajungba mekümi pa asenok nungi pilaogo. Aji oda, pa temang junga aliba tesüsaba anogo tashi pai asen kin aser asen tetsü oshi jenjang ajungkettsü bilema inyakogo. Ao kin nungi Prof. Lanunüangsang mesosemka asünungbo, ashiko, tang tashi kaketrejutem nung Ao tazüngtsü kaket peria mekala aser Arok Ocep-a madoktetla ta bilemer. Aji oda, Nagaland University nung Pro Vice Chancellor kati Ao oshi renlokdaaktsütsü asoshi inyakba committee ka nung shilem agia inyaktsü mulungbaji, atamata ajemalu masü, iba jagi tangartema ajemaludaktsür. Pa amaji zünga shia meteter Tsüngrem akhümtsüba pei kin aser nübortem asoshi asenok tashitemeteter, tulur aser takar ajaki inyak nungbo, asen kin aser nübortem ya alemli ama tanüa asenok atema dang masü saka tangar asoshia koda temoatsü aser tashi tulu aketba kin süla ta bilemer. Prof.Lanunüangsang nung aienba mapang parnok medemer tashitemeteterem longjemmer Naga Scholars' Society tenzüka asen lima yimten aser loktiliba nung temelenshi tajung bener arutsü asoshi nübortem den shisalemsatepa inyaka aruogo. Aji oda, Nagaland nung yi meyanglutsü aser mayoktsü özüng latetdaktsüba tongpang nunga NSS purtemi anir tongti shilem agiba ajanga takok ngutetba arogo otsü nung jembir. Ano, parnoki asen lima ajungtsü atema kanga süoki ia jembiba onük kaji tanü agiba election yimya ya asen kin aser sobaliba dak apet inyakim tajungba aser tapetba ka agi melentsü nüngdakba indang liasü. Ashiko, parnok NSS purtem ajak taküm lia akhi ama longjemshir Naga yimten ya latettsü jembir nungbo India mulungjanga koka jembiteter lila. Tanü parnok aika asenok nungi pilar, parnok melen parnok ama pei kin aser nübortem meimba lenir aser tesayur tajung mengutet asen lima kangshidagi. Tapu ter a jembiyonga, asen lima ya tajungba kuma yanglushitsü atema, Prof Lanunüangsang nung ama, takar tulur aser tashitemeteteremi pei dang nungi pei nübortem temeimba memeimtetra aser pei akatsü jangraba dang nungibo pei lima kadaktsütsü tejangraba tuluba kuma meinyaktet tashi asen limabo tamajungba dang kümadoktsü. Tanü parnok mapa aser shisa tajung bilemteta jembir dang, asenokia parnok ama asen kin aser nübortem meima tenzüksü mulungtetdi.

OLEMSABANG

MOLUNGKIMONG LITERATURE BOARD-i ZÜLUBA: OSEMLOK

~ Rev. Tamsü Imchen

Küm 100 Buba Among (Centenary):-

Ao lima nung arogo aika Jubilee monga arudage, ajaki ya shitak ta bilemstsü arogo shia Jubilee anogo shimdang mezüng Baptiba anogo nung ajemeter dang inyakyonga arua lir. Assam limai American Baptist Mission 1886 nung aruba Centenary among 1936 Jorhat nung liasü, aser 125 anniversary among Gauhati nung 1961 liasü, item ajak Mission aruba among liasü ta otsü nungi angateter. Ao arogo Hon Jubilee 1926 nung Impur nung amongbajia Dr. Clark Molungi atuba nungi azüngba küm liasü. Ibai arogo tenzüka Jubilee masü, 1926 nung Ao Jubilee amongba apijibo 1976 nungang abensatsüba lir. Assam Jubilee jia Nathan Brown Assami aruba anogo nungi asükba liasü. Ibai tesuiba nung agiba Jubilee ji khuli ya lir. "The completion of 50 yrs since Rev. E. W Clark came into the Naga Hills Assam was celebrated by the Christian Nagas at Mission Station of Impur April 1-4, 1926 (The Ao Naga Jubilee, by Mrs. B.B. Longwell),

Tanga area nung amongba amaji Ao arogotemia amongtsü tenungdaktsü sua aküm nungbo, Godhulai kodang Dekahaimong, October 1871 nung atong iba anogo nungi tenzüka sukyonga aruba küm 50 abensaba anogoji Golden Jubilee asütsü aser 100 bubaji 1971 küm Centenary alitsü. Saka kodang ya Theological maparen aser Lai tesayuba den medemdanga bushidir tera tim masü amai lir. Arogo tenzüka anogojiang shitakba agibo Arogo KIMONGJI asütsüla. Anungji Ao lima nung AROGO TENZÜKBA KÜM 100 KA AMONG amongtsü atema Ao Mongdang Centenary Special Committee- iba, Dec. 23 1872 nungi sukyonga arur. 1972 nungji AO AROGO CENTENARY YEAR ta amongtsü shimteta Mongdang dangi abener.

Iba report ya ajaki kanga mulunga Ao Mungdang, November 1965 nung agizükogo. Yamaji iba among tulu 1972 NOVEMBER ita nung Impur nung amongtsü ajaki yongyar-a liasü.

1872 küm Dekahaimong nung parnok 9 Sibsagor nung aser parnok 15 Dekahaimong yimdak tzü nung baptia mezügbuba Naga church tenzüka. Iba mapang nung Khristan 24 ji Dekahaimong yimdak liasü. Saka Dr. Clark report ajanga 1874 küm nisung 2 arogo nungi atsünger Khristan 22 dang akümba indang shia lir.

Dr. Clark-isa 1875 küm report agütsüba nung Khristan aika atsüngzüka orr tamanger 12 shi dang anüngba indang shia lir. (Naga Church had suffered from a great defection and that not more than 12 of the disciples could be found to have maintained their integrity. Mission to the Assamese Sibsagor, Sixty-First Annual Report, 1875) Dr. Clark report nung 1876küm Naga church züngsem 10 dang akümba indang shia lir aser ibajia Molungyimsen nung ang aliba indang shia angutsü. (True, the Naga Church members are considerably less than they were a year ago. Three have died, and the walk of some was so disorderly that it was deemed best to exclude them. The Naga church now numbers ten, and is entirely distinct from the Sibsagor church. No baptisms during the past year. Mission to the Assamese. Sixty-Third Annual Report, 1877)

1877 küm-a Naga church züngsem parnok 10 dang liasü aser parnok 10 jia Molungyimsen nung aliba indang dang shia lir. 1878 küm Molungyimsen yimdak parnok nisung 7 baptia Naga church züngsem parnok 17 akümba indang yamai shia lir (The year 1878 has closed. The members of baptism were 7. No other changes in the church statistics. Total church membership, 17. Mission to the Nagas, Sixty-Fifth Annual Report, 1879)

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Korean Bible Society (KBS)-i Korean Laishiba tasen ka saya



April 08, 2025 nü South Korea yimtiba, Seoul kübok Jung-gu nung aliba Youngnak Arogo Tenla kidang New Korean Bible meshiteta sayaba sentong nung tangokba noksa nung angur.

Seoul, Rongchii/April 09, 2025 (Agencies): Korean Bible Society (KBS)-i April 08, 2025 nü South Korea yimtiba, Seoul kübok Jung-gu nung aliba Youngnak Arogo Tenla kidang New Korean Bible meshiteta sayaba sentong agiogo.

KBS-i ashiba agi, New Korean Bible ya Korean Arogo tarutsü putu atema meyipzükba lir.

Iba Laishiba meyipzükba project ya Board-i telemtetba agiba sülen 2011 küm tenzüka liasü aser küm 13 agia iba project tembang.

Laishiba tasen meyipzükba aser reprangshiba nung denomination balala nungi Lai nung mongin 36-i shilem agia liasü.

Iba sentong nung "Azüngtsü, Angatsü aser Benshitsü" (Jungkai Adok 1:1-3) omen nung jembidang Youngnak Arogo nung Senior Pastor, Rev. Woonsung Kim-i, "Asen linük timtem tensa ka nung liaka asenok atema Tsüngrem temeimji tatem maka. Tsüngremi asenok dang aochiba aika rongnung Pai asenok nem Pa O agütsüba ya lir," ta ashi.

"Missionary tem asen limai marudang Manchuria aser Japan oshi nung tama Lai meyizüktettsüsa Tsüngremi asenok moatsü, ibayongji missionary tem asen limai arudangyongi parnok ket nung Laishiba liasü. Iba taochi ya tanga linük aika nung mengutetba taochi lir," ta paisa ashi.

"Tsüngremi asenok nem sempet aika agütsüner. Sempet tulutibaji Yisu Khrista lir. Iba ya mapang talangka nungi Tsüngremi asenok atema sentong renemja aliba temeim sempet lir. Ano sempet kaji Laishiba lir. Tsüngrem temeim ajanga kilirtem aikati kin balala indang oshitem nung Laishiba meyipzük aser asenok ket nung agütsü. Laishiba alemtsü atema küm meyrjang aika agi,

aser tang asenok ket nung Laishiba aliba ya Tsüngrem taochi aser sayatena ajanga lir," ta paisa metetdaksü.

"Iba Lai tekong ajanga yamai ashir, shirnoki Tsüngrem O züngdir, angadir aser benshidir parnok moatsütsü. Teinyaktsü mezüngbubaji Arogo dak keta lir. Alima ajunga nem Tsüngrem O metetdaksütsüji mission ji ibai lir," ta pai ashi.

Laishiba tasen meyipzükba dak sendakba nung pai, "New Korean Bible ya jangjajanga meyipzükogo. Tazüngerji kija saka Tsüngrem O angaa benshirji aika liasü. Iba mapang nungji ajak ket nungbo Laishiba maliasü. Synagogue nung kari tashie azüng aser lokti jagi angaa liasü. Tang tasen meyipzükba Lai ya angatettsü melamelar," ta ashi.

Rev. Kim-i, "Laishiba tashie azüngtsüji Arogo dak keta lir. Arogoi iba mission ya tejangraba nung inyaktsüla.

Ajisüaka tejashitsü kaji, tanü Korean Arogoi Tsüngrem O proktsü atema atsüayonger. New Korean Bible ya ajanga Korean Arogo jenjang yanglutsü aser Lai zünga Tsüngrem O prokba asentenshitsü ni ilmar," ta ashi.

"Tamangertem-a teinyaktsü shilem lir- tenarong lapoker Tsüngrem O züngzünga angatsüla. Meimchir teshisadangba yutsür Tsüngrem O agizüka 'Amen' ta ashitsüla aser alima dangi oa Tsüngrem O benshitsüla. Tsüngremer temoatsü agizüktsü atema Arogoi Tsüngrem O azüngtsüla aser tamangertemi ibaji angaa benshitsüla," ta pai ashi.

"New Korean Bible ya ano khen meyipzüktsüla. Kodang Tsüngrem O angashirtemi pei taküm nung benshidir ibaji-a Lai meyipzükba tapu ka, ta ashitsü akok. Laishiba ya asen akumli piyong meyiptsü nüngdaker," ta pai ashi.

(Maneni tapak 8 nung...)

ANO GO ABEN TSÜNGREM DEN

Takok Rongsen

- T.Ken 119: 161 - 168

"Temakzükba oset angur nisung amato; ni ne O nung pelaseta alir" (t. 162). Rongsen tuluji asenok kodang angu? Yimya agi tongpang rara ka sülen rongsen tuluji angur. Iba tekong nung asen taküm nung tongpang rara ka tenzüka indang sayur.

Shi nisung mesüra yimya koloki Laishibaji tazüokba nung azüngtsü aser bushitsü mejangrar. Alimai aji maginer. Alimai Laishibaji sentoker, tiyazü aser amajok tebilemba nung amangdaktsüner. Satani Laishibaji sempar. Asenok koda sür Laishiba nungi piladaktsütsü pai pa tajungtiba inyaker.

Aji asü nung Laishibaji tejak o tejak na chitepa raradak ka akümer. Asenoki Laishibaji jangraa mezüdaktsütsü asoshi Satani jangratemtsü kaket aser magazine tamajung aika adokdaktsür aser agütsür.Laishiba melen item kaket tamajungtem azüngba ajanga Satani asenok taküm nung takok ngudaktsür.

Atangji Laishibaji takok rongsen lir. Iba nung takok angutsü asoshi ken ken rarateper. Saka ano idakji tepela lir. "Temakzükba oset angur nisung amato, ni ne o nung pelaa alir" (t. 162). Laishiba azüngba, bushiba aser ibaji rizünga ayubaji lenmang tajung ka lir. Taküm lenmang nung aibelen masütsü asoshi Laishiba nung kechi jungkai adoka sayur aji ne mulung nung rizünga ayutsüla. Laishiba bushiba jagi asenok taküm takar kümdaktsür. Lai bushiba jagi o ji dang angatetdaktsür masü saka na Tezülurji tali mesüka kümdaktsür.

Tamangertem shirnoki Laishibaji azünger aser bushir parnok anema Satani tongpang rara jazüker. Kechiaser nai kodang Laishibaji azünger aser bushir na Yisu mesük tali akümer.Nai tongpangji kokra, temakzükba oset nungji na pelaa alitsü. Tsüngrem O bushiba jagi na takar kümdakjang.Rongsenji agiang aser Laishiba bushiba tepelaji ne meyong kümang.

Impur nung Chowkidar aser kinüngtsürtem asüngsashi sentong agi



Impur, Rongchii/April 09 (TYO): ABAM Women Ministry ajanga ayonga Chowkidar aser Kinüngtsürtem asoshi asüngsashi sentong ka Impur nung Rongchii 7 & 8, 2025 anogotem nung kanga temoatsü ngua agiogo, ta ABAM Officiating Executive Secretary, Rev. L. Yapang Mollier-i sangdong ka ajanga metetdaksü.

Arogo nung tanelar wadang

nung shilem tulu agiba telok rongnung parnok yaa ka lir. Nisungtemi jakdaka menguaka mapang ajak nung mazüngi sentong tetenzük nungi tatem tashi lokti tiptema amongba nung tongti shilem agirtem ya parnok lir. Parnoki Arogo toktsür mouteter asünung aiben tenzükertem sentong balala nunga arua medenteti tangazüktsü sentong balala nung maongka

magitetba ajurur. Anungji, parnoki Arogo mapa nung shilem tulu agiba angateta ano tawajemba nung inyaka temoatsü maneni agitsü nükla yur iba asüngsashi sentong agiogo.

Sentong nung tongti O jembirtemji IEF President Dr. Chujang Aier, aser ABAM Women Ministry nung Secretary, Mrs. T. Arenla Lkr na liasü.

Sentong nung ken tener Samaro ajanga tanelar ken tajung aika atenba ajanga tayongzükba tajung agüja kanga temoatsü nguogo.

Ajak agi Arogo 79 nungi Chowkidar aser apuanitem meyokteper 164 arua iba sentong nung aden.

Maneni Tsüngremer mapa inyaka aodang aika asoshi temoatsü nübotem südakjangma ta sarasademer.

AO OSHI ANGAZÜKDAK:**TANÜ ANGAZÜKTSÜBA OJANG****Temeiner**

(n) külemi yarisema aoer, kija moudaktsüi anidaker (escort)

* Kübu tesayur inyaki tangaleni aodang temeiner aika liasü.

Temeja

(adj) tebentet, temeyoktep mali (special , pure)

*Sentep nung tebur temeja agi ken ka aten.



Tir Yimyim

OLONG PAITEP # 7118

1						2				3
								4		
5		6				7				
8										9
								10		
				11		12				
		13								
14						15				
				16						

TIPLIN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7117 TELANGZÜBA**TIPLIN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü,
4. Kua, 5. Mitsüktsü, 6. Azübenshi,
8. Lah, 9. Jangkok, 12. Akok,
14. Nashi, 16. Sür.

**TANÜLAI ALOKBA DEN MANENI JEMBIR.**

Alokba : O Kibuba, Taonunga ya mangdang asü pongmang, nai kechi shiner ?

Tanüla : Alokba , nenok Naga nunger aser Aor dang yamai shiangno !

1. Tetsür narong nung naro melira mazür amai nenok Naga nunger Aor tolur ket nung rongsen melira maksü amai bilemer ta shiang!
2. Tsüngrem tenzükertemi ki tajung ka nung melira aser gari tajungtiba ka nung mesenzüra Tsüngrem tenzükerto masü amai bilemer, aser shi azüapongba otsübo parnok nungi timba atoker ta shiang !
3. Tamangertemi Tsüngrem o jembir dak nungi junga jembiogo ta asüba dang nungi mapang tatsüka dang agiogo ta asüabajing jenjeng toluba ta yimlaa atar,
4. Aser yimten yimsüsürtemi ozüng dak dang rangloker, saka nüburbo mezüngshir aser temesepba chiyungtsü achiajemtsüjibo parnok asoshi tesatempa lenmang ta bilemer ,Naga limaji küla Ni asoshiako, saka Naga nungerbo Aiatai ta shiangno !

Alokba : O Kibuba Tanüla !!!!!

Lilir : I. Kilang Ajem, Dimapur.

Meghalaya nung scientific coal tenzükter

Shillong, April 9, 2025

(Agencies): Meghalaya nung scientific mining tenzüktsü atema nisung 11 nem "mining opening permission" agütsütsü ta Chief Minister Conrad K Sangma-i ashi.

Tang tashi nung nisung aseme scientific mining methods amshia nakmati atutsü tenzükogo. Centre sorkari lateta aliba inyakyim ama parnoki inyaker aser safe transportation onüktem reprangshimdar ta CM Conrad-isa ashi.

OFFICE OF THE
MOLUNGYIMSEN VILLAGE COUNCIL
(REONGSANGER PUTU)
P.O. Tuli-798618, Dist. Mokokchung : Nagaland

Ref. No.

Date. 08.04.25

METETDAKTSÜR

5th NSF Federal Assembly April 11 & 12, 2025 Molungyimsen nung sentepa amunger, anungji lenmang nung nüburtem ajak tiptema senzütsü meji Tuli - Molungyimsen tsüngda 10-12 April (Thursday - Saturday) nung log aser koila abenba gari (Heavy Vehicles) mesenzütsü metetdaksür.

Sincerely,

(Lanuyanger)

Chairman,

Molungyimsen Village Council

Orphanage home ka nung injang khaloktsüba atema lungkak ait

Imphal, April 9, 2025

(Agencies): Imphal West district kübok Sagolband Meino Leirak nung mejangjatetba nisung kari Bodbarne orphanage home nung injang khaloktsü.

Iba tatalokba sülen Sagolband Meino Leirak nung Apunba Meira Paibi temi mener lungkak aitba sentong ka agi.

Nisung ana motorcycle nung mener aru aser prangpong agi children's home nung injang

khaloktsü. Iba ya tanep 2:00 ako meta atalok saka tia kaa nisung yiruyibong kecha maliasü.

Iba tatalokba atema Meira Paibi temi "onoki ibala tashiyim mapa aitsür", "nisung lokti alidak injang mamshitsüla" aser "onoki tangsa temeten aginür" ta tezülubatam amer lungkak aita liasü.

Orphanage home kibur Kh Romita Devi-i lar children's home amakba atema kanga aoksaba metetdaksü.

Teloki shinga nungia sen meshiba shiditem mangu aser tekaratiba nung iba mapa inyakba atema kuli agütsütsüla ta laisa ashi.

Iba tatalokba atema Manipur police-i ken o benoker bushisüngdang tenzükogo.

USTM Chancellor Hoque indang interim bail atsülangogo

Guwahati, April 9, 2025

(Agencies): Okadaki University of Science and Technology Meghalaya (USTM) nung Chancellor Mahbubul Hoque nem April 25 tashi interim bail atsülangogo.

Bodbarnü iba ken o atema angadang diary maliba ajanga mejembitet. Dhekiajuli Police Station nung benoka aliba ken o atema Hoque indang bail atsülangtsüogo.

March 2025 nung Dhekiajuli

Police Station nung benokba ken o dak sendakba nung Hoque tanaben apu.

Sribhumi nung Additional Chief Judicial Magistrate Court-i production warrant ka agütsüba sülen Sonitpur Police-i pa Sribhumi District Jail nungi apu.

Iba ken o ya Mukshed Alom-i benok aser pai Indian Penal Code o Unlawful Activities (Prevention) Act (UAPA) kübok ken o balala nung tai tongloksü.

Hoque-i April 13, 2025 nü Tezpur court nung oa noktaksü.

Gauhati High Court-i Barpeta, Kokrajhar, aser Gossaigaon police station tem nung ken o benoka aliba atema stay orders agüjaka Hoque anema ano ken o aika benoka lir.

Taoba nung Hoque den nisung pungu tashi Sribhumi District Jail nung puoka ayu saka Hoque ya Dhekiajuli-i anir ao.



Narcotics Control Bureau (NCB) Director General Anurag Garg-i Mongulbarnü Aizawl nung Mizoram Chief Minister Laldhuma den ajurutepa senden ka amendang agiba noksa angur. Mizoram nung drug trafficking aser substance abuse tebilemtsü atema senden amen aser idangji Myanmar den arrtsü akangshitsü jembitet.

PELABA LEMSATEPER

Ajunben lendong ka April 04,2025 anepdang züngia Tsüsapang Sector,Mokokchung Yim nung ozü Saw Mill nung mi adoka arongba mapang ajungbena dang süaka kija kibong, lokti shirnokisa ozü kibong koda mesüi tejashi aser taoksa agi tonger temelung shiranga alidang shirnokisa nübo, rongsen, shisatsü aser sarasadem agi temelung ajak agi nungita yariogo nenok ajak dangi tsüngdong aruagi pelaba melemsatet nung iba osang ajanga nenok ajak den pelaba lemsateper.

Teyanglur takarsang Tsüngremi nenok mapa tajung asoshi tarutsü anogotem nung nenok ajak azükarua moajangmata ozü kibong tamang sarasadem.

Tepelaba kar ano maneni yamai lemsateper:-

1. District Administration,Mokokchung

2. Fire & Emergency Services,Mokokchung

3. Chuchuyimpang Senso Mungdang

4. Chuchuyimpang Baptist Arogo

5. Chuchuyimpang Senden Menden

6. Tsüsapang Sector Yimden

7. Mokokchung Baptist Arogo

8. Kilengmen Senso Mokokchung

9. Longpha Senso Mokokchung

10. Kilengmen Baptist Arogo

11. Alisüngkum Baptist Fellowship

12. Union Church Fazl Ali College Campus

13. Longkhum Baptist Arogo

14. Ongpangkong Tetsür Mungdang

15. Chuchuyimpang Watsü Telen

16. Shri. Imkongmar Advisor, Minority Affairs & Sericulture, Govt.of Nagaland.

Sd/-

Mr & Mrs.Tajungnükshi Jamir

Chuchuyimpang Village

AFFIDAVIT

I, **Shri. Yimkongtongzuk**, S/o. Shri. Tinutemsu Ao, resident of H/No. - 506, Lhomithi Colony, Dimapur, Nagaland, India, do hereby solemnly affirm and declare as under :

1. That I am a bonafide citizen of India and a resident of the above mentioned address.

2. That I am the natural father of **Miss. Arenbenla**.

3. That I am serving as a Sepoy at Defence Security Corp. bearing Army No.4368516Y.

4. That my daughter's name has been inadvertently entered/recorded as "**AREN PENLA**" in my official service records, Whereas my daughter's correct name is "**ARENBENLA**" as entered/recorded in her Aadhaar Card bearing Aadhaar No. - 5261 6713 5770, PAN Card bearing PAN No. - EYOPA4294Q and Birth Certificate bearing Regd. No. - DESO/D/2971-24, issued by the Department of Economics & Statistics, Government of Nagaland.

5. That henceforth, whenever my daughter's name "**AREN PENLA**" arises it should be construed/rectified as "**ARENBENLA**" for all official purpose and intents.

6. That the statements made in Para 1-5 are all true and correct to the best of my knowledge, belief and no part of it is false.

And I sign this affidavit on this 9th day of April 2025.

Adil, Deputy Commissioner

& 1st Class Magistrate

Office of the Deputy Commissioner

Dimapur : Nagaland

DEPONENT

ALI TAYOKTSÜ LIR

1. 3 Pura. Foothill road tangshia 150 per sq.ft

2. Foothill lemanng Teak lu anasa, 120 per sq.ft

3. Showuba fly over anasa 190 / 250 / 310 per sq.ft

~ Contact : 9863826159

Dominican Republic nightclub ka chirep, nisung 98 asü

Santo Domingo, Rongchii/ April 09 (Agencies): Dominican Republic yimtiba Santo Domingo nung nightclub ka indang kilem chirepba lendong nung nisung 98 asü aser 150 dak tema yiru ta ketdangsür temi ashir.

Asürtem rongnung provincial governor aser taoba mapang Major League Baseball asayar Octavio Dotel densema lir. Arishi küm 51 tain Dotel ya iba lendong nungi aniteter mozü kidangi aodang len tom nung asü.

Jet Set nightclub nung nüngtugu kentener Rubby Perez-i Mongulbarnep ayongzükba concert ka nung iba lendong ya atalok. Asürtem rongnung pa desema lir, ta pa indang manager-i ashi.

Iba ki telung nung nisung noklang aika liasü aser tekumzükür nisung 400 shi adenshia takum alirtem bushiba mapang lir. Asürtem ya timba akumtsü südi ta tsübor.

Emergency Operations Centre (COE) indang director Juan Manuel Méndez-i iba kilem alua bembangba nung karbo takum alitsü imlar ta ashi.

Jet Set ya Santo Domingo nung kanga nüngtugi nightclub ka lir, kong Hombar nikongdang teti kenten menü sentong ayongzükür, kong yimten yimsüsür, saisaponger aser tejangja nisungtem arua adener.

Asürtem rongnung Monte Cristi province governor Nelsy Cruz dena lir ta Tir Luis Abinader-i ashi. La ya taoba mapang baseball asayar aser tenetben Major League Baseball All-Star, Nelson Cruz tenu lir.

Dotel ya 1999 nungi New York Mets atema asaya tenzük aser Houston Astros, Oakland A's, New York Yankees, Chicago White Sox aser



Detroit Tigers amala team tem nungi 2013 tashi asaya liasü.

Iba club telung nung tangokba video footage ka nung nisungtem ya sapang ka tejakdang langpang nung mentepa liasü aser tesülen Rubby Perez-i ken atendang kar tsüingsanga liasü.

Ano mobile phone ka nungi tangokba video ka social media nung lemsatepba nung sapang anasa nokdaka alir kati "ceiling nungi langka tsük" ta shia pa temeyong ya kilem tsütsü tulukja liasü.

Video nungya kentener Rubby Perez ya nisungpai

temeyong tuluktsülen repranger amai liasü.

Second 30 majungdang ola tuluka angashi aser recording mangmanga akum aser tetsür kati "Oba, nüdak kechi asü?" ta ashiba ola angashi.

Anepdang 1:00 ako (par mapang) meta kilem chizüka aludang iba club sünga nisung liasü, ta Rubby Perez indang band nung züngsem kati ashi.

Rubby Perez'er jalai ashiba agi, kilem tsüka nembanger rongnung la tebu dena liasü.

Tir Abinader-i asür kinungertem den asükhu lemsatepogo.

China-i US oset nung tariff shilem 84 meshitsü

Beijing, Rongchii/April 09 (Agencies): US Tir Donald Trump-i China nunger oset ajunga nung tax shilem 50 tali (ajak agi shilem 104) meshitsü sangdonger anogo ka lir Bodhbarnü China-ia tayang kepzüka US oset nung shilem 84 meshitsü sangdongogo.

China indang Customs Tariff Commission of the State Council ajanga ashiba agi, US nungi bener aruba oset ajunga nung tariff talila meshiba ya taoba mapang shilem 34 sangdonga aliba nungi timba akumba aser April 10, 2025 anepdang 12:01 ako (par mapang) nungi tenzüktsü.

US-i tariffs talila benokba sülen ozü tejangraba kumzüka ayutsü mechi tashiyim agi mera

agitsü temulungtetba lir, ta Bodhbarnü China-i nangzüka liasü.

"China indang sovereignty, security aser terenlok maparen nung timtem agütsütsü merangba onoki odangbo metoktsütsü. Jembishinütsü atema nenoki ashibaji, US-i asangsang nung iba tebilemtsü jembishinü ajanga bentetnüra, kasasa akumtsüboa aser kasa ajangzükba yimba amshitsüla. Saka tang tashi US-i China dak tariffs tali meshia timtem agütsür aser China-i aji maginer aser yamaji mesüshiba kodanga magizüktsü," ta Chinese Foreign Ministry dongtar Lin Jian-i osangbener senden ka nung ashi.

(Maneni tapak 8 nung...)

Ukraine-i Russia atema rara aliba China nunger ana apu

Kyiv, Rongchii/April 9 (Agencies): Ukraine nunger sepaitemi Ukraine anütoklen Donetsk tesem nung Russia atema rara aliba China nunger ana puogo, ta tir Volodymyr Zelensky-i ashi.

Pai Mongolbarnü ashiba agi, itangitertemi Russia indang army nung China nunger ana dak nungi tali alitsü ta shiogo.

Ukraine Foreign Minister Andrii Sybiha-i, China nungertem Ukraine litsü nung rara aliba ajanga China-i yimjung atema nokdakba ya tashishitsü ka kümogo, ta ashiba den ken o ashishitsü atema Kyiv nung China indang envoy jaokogo, ta shisem.

Russia nem nübu agütsüba atema tang mezüngbuba Ukraine-i officially China aitsüogo. Zelensky-i Bodhbarnü iba osang sangdongba dak sendakba nung Russia-i kecha telangzüba magütsü.

Ajisüaka China indang foreign ministry-i ashiba agi, parnoki Ukraine nunger den tensa asadangdar. Parnokisa, China nungertem dang rara nungi pila alitsü atema maneni mepeshia arudar, ta shisem.

Ministry-isa, rara nung ano China nunger aika densema alitsü ta Kyiv-i ashiba ya tamendakdak maka ta shiogo.

Social media sabang X ajanga Zelensky-i ashiba agi, sepaitem ya Ukraine anütoklen Donetsk tesem nung bank card, kong jurila osangtem keta lir, iba amala identification kuli kakettem bener pua liasü. Ukraine nunger sepaitem China nunger sepai trok den raratep aser ana pua liasü, ta paisa shisem.

Iba osang den külemi pai video ka lemsatep, kong China nunger ana rongnung ka teka alener aliba nguogo, aser iba nisungba yagi Mandarin Chinese oshi nung rara rasa shia liasü.

"Tena ya dang masü saka

Russia indang army nung ano China nunger aika lir ta osang angzükogo," ta Zelensky-i ashi.

"Europe nung iba rara nung Russia-i tanga linüktem den China dena indang indang mesüra tanga lenla balala nungi densemdaktsüba ajanga Putin-i rara tembangdaksütsüba dak alaka tanga kechi südir süaka inyaktsü tebilemba aliba sayur," ta Zelensky-i shisem.

Maneni Ukraine tir-isa, United States, Europe aser alima nung shirnokisa yimjung aginer parnok ajak dang iba anema telangzüba agütsütsü ayongzükogo.

Ken o bushisüngdang tenzükogo aser pua alirtem ya tang Ukraine indang security service ket nung yua lir, ta pai ashi.

Mongolbarnü US State Department otongdar Tammy Bruce-i iba osang ya minprongtsüka ta shiogo.

Ukraine foreign minister-i ashiba agi, pai ken o ashishitsü atema Kyiv nung China indang chargé d'affaires jaokogo.

X nung Andrii Sybiha-i ashiba agi, "Ukraine den rara nung Russia-i China nunger anisemba onoki aitsür."

Paisa, iba jenjang agiba ajanga China-i yimjung atema nokdakba ya tashishitsü ka kümogo aser UN Security Council züngsem ka ama Beijing dak tamang kateta aliba ashishitsüsa kümogo, ta ashi.

France nung osangkaket Le Monde-i taoba mapang ashiba agi, parnoki TikTok indang sister app, Douyin nung China nungertemi Russia army nung adenba indang osang agütsüba account 40 shi jangjaogo.

Ukraine den raraba mapang Russia nem teyari agütsütsü atema North Korea-i sepai meyirejang aika yokogo, ta Kyiv aser anüolen aliba linüktemi metetdaksüogo.

North Korea nunger 1000 shi Kursk tesem nung Ukraine den raraba mapang süogo, ta ketdangsürtemi Mongolbarnü osangbenertem den sensaksemba mapang ashi. Kasa mapang nung Zelensky-i ashiba agi, "North Korea nungertem onok den Kursk tesem nung rara saka China nungertem Ukraine litsü nung raradar."

January ita Ukraine-i ashiba agi, parnoki Russia kübok Kursk tesem nung North Korea nunger ana pua liasü.

Beijing aser Moscow na ya yimden yimsüsüba aser rongsenketzüng nung kaga junga sendaktepa lir, saka China-i iba rara nung parnok teyongtsü nung lir ama sayuner aser Russia nem military hadirtem kecha magütsür ta shia arudar.

Bodhbarnü Beijing nung foreign ministry-i ashiba agi, Ukraine nunger sepaitemi China nungertem pur lira parnok ya pei mulungka nung adenba asütsü.

Longleng nung 3buba inter departmental asayamung tenzükogo



Indoor Badminton Stadium Longleng nung 3buba Longleng District Inter Departmental asayamung tenzükba anogo asayartem tenangzüktepba agiba noksa nung angur.

Dimapur, Rongchii/April 9 (TYO): 3buba Longleng District Inter Departmental Tournament April 9 nü Indoor Badminton Stadium Longleng nung tenzükogo.

Asayamung lapokba sentong nung Executive Secretary PBCA, N. Tialemba Phom alakteta jaoker liasü.

Sentong nung Deputy Commissioner aser Chairman District Sport Council Longleng, W. Manpai Phom-i lokti pela agizükba o jembia aser Pastor LTBC, Rev. H Beau Phom-i Tsüngrem temaotsü meshizüka sarasadema liasü.

O jembiba mapang N. Tialemba Phom-i, linük ajunga nung saisabong balala yagi

nüburtem longjemdaksüba aser mim sempetem jangjadaksüba nung tongtibang shilem agir, ta ashi. Paisa, Longleng district Inter departmental asayamung ajanga department balala yongtsü nung tesendaktep tajungba akümtsü imlaba lemsatepa liasü.

Yimden yimsüsüba tsütsü aser tebilemba balala süaka saisabong ajanga Naga nunger yimden yimsüsüba tsütsü telok balala longjemdaksüba nung koda tongtibang shilem agir iba indang tatishitsü bener arua pai jembia liasü.

Paisa, iba asayamung ajanga asen telongjem sayutsü aser department tem yongtsü nung tesendaktep tajungba akümtsü

aser iba asayamung ya district nung aliba nüburtem atema tatishitsü ka akümtsü imlaba lemsatepa liasü.

Sentong nungsa District Sports Officer, Kenongoto Thokhwe-i achaayanga asayartem tenangzüktepba agi aser Phom Lempong Higher Secondary School-i special presentation ka agüja liasü. Sentong ya Assistant Horticulture Officer, Angngoi Buchem lenisüba nung agia liasü.

Anogo ana asayatsü aliba asayamung nung Badminton, Tug of War, Carron, Air rifle shooting, Table Tennis aser Football Penalty Shootout asayatsü. Iba asayamung ya alakteta jaokeri tenzükja liasü.

Abhishek Dalhor KKR net bowler kümogo

Rongchii/April 9, 2025 (Agencies): Indian Street Premier League (ISPL) nung kanga junga shilem agiba sülen Abhishek Kumar Dalhor, Kolkata Knight Riders (KKR) puri tang asaya aliba Indian Premier League (IPL) season atema net bowler asütsü shimogo.

Iba ajanga ISPL-i cricket asayatsü jangrartem nem parnok sempet sayatsü atema sabang agütsüba aser tia kara temaba jenjang nung asayatsü atema atema maongka agütsüba sayur.

Dalhor ya Ambala nungi lir aser pa street tennis cricket asaya aliba nungi ISPL nung kanga nungtugu asayar ka aküm.

Taoba season ana nung pai asaya 19 nungdang run 324 yanglu aser wicket 33 agia liasü. Mezüngbuba season nung pa nem Player of the Tournament naroküm agütsü aser tanabuba nung Best Bowler of the Tournament naroküm agüja liasü.

ISPL puti otsü nung pa ya sen timtiba agi alizükba asayar lir aser tang pa KKR-i shimba ajanga pa dak sempet aliba aser India nung grassroots jenjang nung asayar tajungtem kaktetsü aser anitetsü atema league dak tashi aliba sayur.

Pa Haryana nung yimtung nungi ISPL nung asayba aser tang IPL ecosystem-i aiba ajanga tekübokba jenjang nung aliba cricket asayartem aika ajungmesotsü.

ISPL ya India nung tennis-ball T-10 cricket league lir aser iba ajanga asayartem nem parnok sempet sayatsü atema maongka agütsü aser iba ajanga club aser selector tem aika atsüa aruogo.

KKR puri Dalhor shimba ajanga, linük nung grassroots cricket melenshitsütsü aser sempet aketba asayartem nungtugu kümdaksütsü league nükjiong aliba sayur.

Iba ajanga ano street cricket aser professional cricket sendakteptsütsü atema ISPL-i shilem agiba sayur, aser iba den sempet aketba asayartem temaba jenjang nung asayatsü atema nükjiong aliba ataloktsü atema maneni inyaktüsü ajungmesor.

Rudi Voller-i Germany team den tenangzüktepba yanglushi

Rongchii/April 9, 2025 (Agencies): 1990 küm World Cup akokba Germany team nung asayar Rudi Voller-i, national team sporting director ama Euro 2028 tashi inyaktüsü atema tenangzüktepba yanglushiogo, ta German Football Association (DFB)-i Bodhbarnü metetdaksü. Pa coach Julian Nagelsmann den maneni inyaktüsü.

Arishi küm 64 tain den tenangzüktepba ya March ita tatemlen Germany-i Italy koka Nations League semifinal-i aiba sülen yanglushia liasü.

"National team aser DFB

kübok team ajak ya ni atema kanga tongtibang kümogo," ta Voeller-i ashi.

"2024 küm kidang Euro asayamung kanga jangrabangra asayaogo aser tenangzüktepba yanglushitsü atema Julian Nagelsmann den tesendaktep ajanga tongtibang shilem agia liasü," ta paisa shisem.

Voeller ya 2023 küm February ita sporting director asütsü shim. Kasa küm September ita Hansi Flick mapa nungi anentsüba sülen pai mapang tatsüka atema interim coach mapa bena liasü.

Pa lenisüba nung Germany team-i friendly ka nung France goal 2-1 agi koka liasü. Iba sülen Flick melentsüpur bushiba team nung pa densema liasü aser pai Nagelsmann atema ajang ajanga nokdaka liasü.

Taoba mapang Bayern coach yagi Euro 2028 tashi iba mapa bena atatsü asoshi tenangzüktepba yanglushiogo.

Euro 2024 nung Germany team quarter-finals tonga asaya saka parnoki 2-1 agi Spain makok. Parnok June 4 nü Munich nung Nations League semi-final nung Portugal den asayatsü lir.

KHRISTAN OSANG : Tapak 5 nungi...

Korean Bible Society (KBS)-i Korean...

"Asenok dak ranglokertemi Tsüngrem angutsüsa alitsüla. Tsüngremi yokba O ji Yisu lir. Yisu ajanga asenoki Tsüngrem temeim metet. Tsüngrem O ama Yisu iba limai aru, aser ibaji alima nem angatetdaksür. Pa asenok jenjang tashi alu aser Tsüngrem jungkai adoka sayu. Tesüngmangtsü O ji Yisu lir. Asenok ajaki Pa nütsüng ama litettsü aser asen taküm ajanga sayutsü ni imlar; ibaji-a Laishiba meyipzükba ama asütsü. Tsüngrem O ajanga aser Tsüngremi melungba ama inyakba ajanga Korean Arogo ano asentenshitsü," ta pai ashi.

Laishiba meshiteta semzükba sentong tembangba sülen academic symposium sentong agia liasü aser iba sentong nungji Lai nung mongintemi züluba kaket balala nung ajemdaker o lemtepa liasü.

Lai nung mongintem aser parnoki züluba kakettemji-Prof. Donghyuk Kim (Yonsei University, United Graduate School of Theology): "New Wine in New Wineskins - Features and Practice of Old Testament Translation in the New Korean Bible" ; Prof. Hyungdae Park (Chongshin

University, Theological Seminary): "Features and Practice of New Testament Translation in the New Korean Bible - Focusing on Source Texts, Grammar, and Expression";

Prof. Sunmyung Yoo (Baekseok University, Department of Christian Studies): "Reading Together the New Korean Bible and the Revised New Korean Standard Version"

Prof. Seungmoon Lee (Myongji College, Director of Chaplaincy): "Utilizing the New Korean Bible for the Next Generation of the Korean Church"; Prof. Suin Lee (Asia United Theological University, Departments of Christian Education and Media Studies): "Reading in the Digital Media Era and the New Korean Bible" aser Prof. Soonhee Kwon (Ewha Womans University, Department of Korean Language Education): "A Study on Foreign Students' Comprehension Differences Between the New Korean Bible and the Revised New Korean Standard Version" kaketem liasü.

BENDANGLI OSANG : Tapak 7 nungi...

China-i US oset nung tariff shilem...

Iba den kümeli ano US entities trok, Shield AI, Inc., Sierra Nevada Corporation, Cyberlux Corporation, Edge Autonomy Operations LLC, Group W, aser Hudson Technologies Co ya 'unreliable entity list' nung inoktsü aser iba inyakyim Brehostibar anepdang 12:01 ako nungi tenzüktsü, ta Beijing-i sangdong.

"China-i teti tamang makatetba entity tem kanga kumdanga amshir aser China indang national security nung timtem agütsüba foreign entities ishika anema dang mera agir," ta Chinese Commerce Ministry (MOFCOM) odongtar kati ashi.

Paisa ochishia aser ozüng sülen anidakba foreign entities asoshi süoki ia bilemtsü kuli kecha maka, ta pai ashi. "Alima tesem balala nungi enterprise arua China nung mapa inyaktüsü maneni pelashishia jaoker, aser China nung züng sülen anidakba 'foreign-invested enterprises' atema business environment tajung agütsütsü," ta pai ashi.

Trump-i US dang tayang kepzüka tax meshiba agientsü anogo züngzüktsüba ama Beijing-i inyaktüsü memulungba yong China dang tariffs talila shilem 50 meshi.

US-i taoba ita tashi China dang tariff shilem 10 meshia liasü. Iba policy yagi US economy nung sen dollar billion aika auyar, ta Tir Trump-i ashi aser Beijing ya "tariff abuser" ta tenüng agütsü.

Iba sülen April 2 nü US tiri "reciprocal tariff" sangdonga US dang tariff meshiba linüktem dang parnoki meshiba tesadang ka shi meshitsü sangdong. Pai linük noklang dak tema dang tariff shilem 10 meshitsü sangdong aser America rongsenketzung auyaba linük dang ano April 9 nü "reciprocal tariffs" tali meshitsü nangzüik. Iba ya China asoshi shilem 34 tali liasü.

Iba yong China Finance Ministry ajanga US oset ajunga nung tariff shilem 34 meshitsü sangdong.

Ano maneni Trump-i Beijing dang tariff shilem 34 ya magienra saru tali meshitsü amokmeren. Pai China nem anogo ka züngzüktsü aser aji meinyakra April 9 nungi tariff talila shilem 50 meshitsü ta shia liasü.

Ajisüaka China-i "tariff blackmail" ajanga onok tsüboa malitsü ta ashi. Iba yongji Trump indang tariff shilem 104 ya Bodhbarnü nungi China nunger oset US-i aoba ajunga nung meshi tenzüker.

BILEMDANGANG

"Tebilemba kija agi mapa takok mongutettsü."